

Pemuda PAS: Siapa sebenarnya subversif
Malaysiakini.com
June 30, 2011

Dewan Pemuda PAS Malaysia (DPPM) menampelak kenyataan Ketua Penerangan Pemuda Umno Malaysia, Datuk Seri Reezal Merican dalam Utusan Malaysia hari ini yang menuduh PAS, PKR, DAP dan sekretariat BERSIH mengamalkan kegiatan subversif dan anarki.

"Saya selaku ketua Dewan Pemuda PAS Malaysia (DPPM) mencabar Pemuda Umno khususnya Reezal Merican untuk membuktikan apakah peruntukan dalam Perlembagaan Persekutuan yang mengharamkan rakyat berhimpun secara aman dan tanpa senjata?" kata Nasrudin Hasan.

"Sedangkan saya mahu Reezal Merican (kanan) melihat apakah tindakan provokasi ratusan Pemuda Umno Malaysia yang berhimpun untuk mengecam dan mencabar untuk membakar bangunan PKR beberapa malam yang lalu adalah perbuatan sopan dan baik?"

(Exco Pemuda Umno, Lokman Noor Adam hari ini membuat laporan polis menafikan bahawa beliau berucap mengugut untuk membakar pejabat PKR di Tropicana).

"Adakah Reezal Merican sedar bahawa PERKASA yang melancarkan Gerak Aman dan Pahlawan Keamanan sambil melontarkan beberapa kenyataan berbaur pertembungan fizikal bukan sesuatu yang mengancam keamanan negara?" soal Nasrudin dalam satu kenyataan.

Malah, Nasrudin (bawah) bertanya adakah Reezal Merican tahu terdapat pertubuhan silat di negara ini yang bersedia untuk menghalang peserta himpunan aman BERSIH 9 Julai dengan tanpa jaminan bahawa anak-anak buah pertubuhan silat itu akan melakukan tindak balas yang agresif.

"Sejak sekretariat BERSIH mengumumkan Himpunan Aman BERSIH 2.0, tidak ada satu pun kenyataan kami yang menggambarkan akan berlaku kekacauan dan huru-hara pada hari tersebut.

"Tetapi sebenarnya, reaksi emosional Umno, termasuk rangkaian dan media miliknya yang cuba menanamkan rasa takut kepada jiwa rakyat sehingga pelbagai ancaman dilemparkan penganjur BERSIH.

"Siapakah sebenarnya yang cuba bersikap subversif?" soalnya lagi

Sebaliknya, kata beliau, perhimpunan tersebut dijamin di sisi Perlembagaan Persekutuan dan ia akan berjalan secara aman tanpa sebarang perancangan dan agenda sulit.